

楚

望

閣

詩

集

楚望閣詩集卷二

甯鄉程頌萬子大簪

五言古詩

朱樓曲

東風吹長隄柳色何青青誰家大道旁朱樓語流鶯樓中有
美女黛色修蛾橫稱身垂纖羅素手調銀箏祇憐春光暮不
怨春風清一彈再三歎掩抑如有情所恨無知音輾轉中腸
縈

渡湘

秋色何空濛霽景復明媚擊汰入湘流澄波浩無際歸雲帶
帆溼斷虹低渚墜繚繞水仙祠金碧遙空閣一鶴下迴汀浴
鷺羣相避暮色帶殘霞墮入前溪翠呼渡不見人寒鐘隔江

寺

春風從東來一首

春風從東來吹綠庭中樹簾裏有人愁簾邊無燕語燕語人
不知低頭雙淚垂已看花漸發坐見鬢成絲鬢絲青未老花
發春歸早淚臉不堪勻愁絲難獨裊屈成掩金蟲匳鏡開朱
鳥夜短不成眠坐待房櫳曉曉起下閒階花邊細語來忍看
鸞背鏡偷插鳳頭釵步小空憐印身輕怕滑苔柳邊空悵望
闌畔卻遲徊同心雙結子歸去深閨裏嬾衣長袖衫新裁合
歡綺惆悵有情人空房淚如洗珠淚洗銀河近來愁更多雙
飛蝴蝶影日夕傍庭莎庭莎空自碧休凭高樓立哀怨咽秦
箏曲終長太息此夕織迴文明朝遠寄君何勞一匹錦化作
夢中雲

暮投寶華寺

斜陽入招提窈窕無人境
病鶴不梳翎伫立蒼苔冷
楓林淒暝色月上孤峰頂
荷鋪一僧歸空廊踏松影

曉發銅官渚

晨起推篷窗濛濛一江霧
不見江上人但見江邊樹
何處樵歌聲抽帆翦江去

贈閻季蓉還武陵二首

庭前雙桐樹百鳥巢其顛
柔柯媚初日修榦凌朝煙
鳳皇揚靈音彩翮何翩翩
褰眾禽戢其羽俛首殊可憐
毛羽常自慙容華竟誰妍
安能從君去一擊凌九天
羞與鶉鷃儔中庭戲連翩

綠蘿陟高峰江聲下崔嵬
洞門雙石扇飛瀑從天來
子行沂

沉濱邱壑緣溪迴言尋善卷室復上仙人臺徙倚渡石梁標
緲凌層崖天風岸巾幘白日空塵霾下有百尺波上有千年
苔飢飡黃精苗醉吸紫霞杯眷言慕高隱曠世忘形骸

曉起

芳蘭媚庭除邃館藏春威披衣向晨起宿霧猶霏霏南園曠
且清雜樹搏朝暉牆傾籜始茁戶掩苔正肥昨夜玉樓客甯
知朝露稀佳期邈何許枯木無新葳春歡日貽蕩旅思還依
微穠芳不可翫回首涕長揮

秋懷

幽人處蓬扉卻掃無行跡墜葉當階翻寒鴉翳無色商飈激
庭柯纍纍墮芳實逝物隨秋零人生渺何極還將澗底松寫
人秋堂碧

銷寒述六十韵和何詩孫舍人兼示何郎魁玉

憶和石鼓詩退之共坡老目空無古人神王各年少奇句驚
突兀險韵嗟苦拗奇險何足論元氣握靈造三章力未疲五
篇良可寶銷寒賦集限韓蘇石鼓歌韻得五篇余三篇仲冬月圓夜小窗明窈窕
詩源方濫觴各富奚囊藁六緣敝僊館丹蕉雜青篠坐次相
迴環元譚任搜討時登萊雲閣斗室倍溫燥桂隱鬱巖阿蘭
蕤合襟抱漣陽忽于役煙雲川路盲離羣方浹旬朔歛侵眸
瞭羈感睞良儔層陰翳富媼時違北海尊休薦南山棗契甘
蘭臭投味擬菜根齟闕宵作狂雪玉龍奮鱗爪韵催郊鼎分
醉豈韓騶惱茶壘書淋漓詩神耆醉飽髯魂應嗤余謂余年
太小余澧陽歸於除夕祭詩爲東坡補祝生日座開余齒最卑新年忝歡讌人日金樽倒
書城隘妻拏酒肆識庸保東風飄浮雲纖月窺皎皎夢冷溪

橋梅春遲樹顛烏眷言隘九九歡賞愜朋好每懷歲莫難還
睇春光早載稽荆楚記嘉會或嫌少昨朝第十集劇飲夜將
卯巨碗何洗洗深杯亦浩浩譚笑各瑰奇意氣莽騰蹻何郎
方十齡聽言毋藐藐我昔如郎年綠梯升樹杪學詩效院體
墨汁污襟褳十一畢羣經師說戒輕佻十二屬文辭清氣閒
華藻十三稟庭訓詩歌聲裊裊輕裝渡洞庭江源瀉瀨瀨行
卷積牛蜀敝帚如腐匏人生忽昏冠須臾變春姣橫秋厲羽
翰汎駕瞻蓬島嗟予狂狷才難軌中庸道何郎好頭角門閤
尤表表方瞳爛明珠生長在燕趙雛鳳揚靈芬寒篴澈清獻
阿爺天縱姿伏櫪嗟騷裏高名籍蔽省書畫懸清妙三吾接
魂夢倦翮恣騰矯暄柳暖長隄靈波漾春沼侵晨試薄棉旅
思愁孤渺出門但覓飲世網徒蒸罩中章劇騷屑操翰毋恠

憚所歡二三子日日醉清醪
梧籊棊簟安松廬塵榻掃簫鼓
咽春城絲竹繁音媚蟬媽
春禊飲津寄前賢紹馬工并枚速
厥詣無嬌巧蜉蝣祇百年太息望蒼昊
夢綴春前花愁生秋後
草詩成耿不眠檐曦照杲杲
銷寒屢集詩孫居曰支綰移蔡竟夫居曰松廬胡子寬居
日萊雲閣朱竹仙居曰六條館

夢游桃源詩 有序

甲申春予游桃源惜甚勿遽將以今春攜友重游
仿唐朗州司馬劉禹錫爲夢游桃源詩五十韻質
同社諸子訂和

積霰遲春期荒齋坐冥寂臺榭羃新紅闌干墮瑤碧精移倏
恂恍層巘夢魂陟髣髴兩青童扶我度林隙山遠失陂陀路
狹迷阡陌驚濤爭晝昏空翠幻疇昔劃然覩平疇心神增悅

樺村落暖清寥煙巒互縫掖仙侶歛逢迎塵緣澹幽闌贈我
紫玉簫坐我流霞席丹書貯懷袖靈章恣紉繹時倚毛公杖
或假安期舄危梯盤鳥道虹梁巨翕闢方亭峙其中道路疑
阻阨洞門雙石扉飛瀑盪精魄磨崖書可觀秀采嵌瑤白靈
芝露向晨仙竹雲生夕舊潦蟄殘龍新波迴畫鷁蒼然兩岸
霞屹立千尋壁泉香漱屐齒柯爛得棋癖引鶴磻邊行折花
林下劇倦游腰腳疲遐想精魂惕非醉亦非醒霞綺證標格
此樂足千載元靈鑄肝膈回溯去年春雲山能辨析白馬浪
孤懸綠蘿峰百尺和風漾春帆江路何偏仄吟朋結四五巖
阿厯千百薄暮劇忘歸脩然意云適嗟嗟世陸沈吾道競騷
驛帝王渺邱陵賢傑遭彈射蟲珞禍梨棗蟬組爲羈勒貴悲
金谷塵富忍銅山斥恨海渾無垠愁城莽蕭瑟時名卑狗屠

世味戀鷄跖但傾北海尊休表南山石自非金石軀消磨任
砂礫今宵事況惘舊境嗟重歷天風何琅琅吹我旅魂息醒
餘猶記憶更闌殘漏滴昏鴉闌遠林病鵠影空磧庭荒懸溜
充樹闇眾竈激何期玃玃蝶復爾能高蹠微吟感遙夕獨往
成撰策蠡亭飲一勺安棗懷雙核饑餐玉釜精臥覆霞綃帛
蓀苓益大年山川冠幘遨遊控鸞鶴哀傷任虺蜴鴻龍不
可噉星斗乍捫摘俯視人海中波濤但昏黑

觀音巖

在永順府
東十里

幽居晤元覽遠客羈蠻陬巖懸日以陰谿響樹始秋行行出
南郭奇賞延茲邱石罅澗底合嵐翠天端浮眾壑迴向背鳴
泉爭湫流羣峰束江行勢若迴萬牛沿巖躡陰厠一一窮冥
搜斜巘逗層級倒巘淩危樓還持壺榼會戀此林樊遊何當

閉巖隱物我無與尤

不二門

仰闕不二門俯瞰猛峒河巖光忽中斷峽勢爭盤渦巉天石
作峰倒景梯緣坡神工闢一綫日色迷雙螺架木接懸狹探
崖挽垂蘿雲光晝谿樹色暈嵯峨偉哉果勇績橫空書壁
窠有果勇侯楊芳摩崖書代遠趣豈隔塗危履不頗歸轡整向夕昏鐘
度林阿

鳳灘

衝湍無停舟亂石夾舟轉招呼過鳳灘悚伏不敢喘江身排
積鐵浪勢壓眾巘噴薄阻舵力猛迅失篙眼初鳳迄二鳳首
尾互俛偃驚怒非祥禽奮爪攫巨觚檣傾魄已懾掉轉目未
眄聞聲老蛟喜挾怒吳犀刺犇流觸三鳳偉若神力鍵灘師

尺寸失龍黿飽一轡遐哉神禹蹟疏鑿力未展微生衷忠信
駭膽鬪絕險白日下重潭輕颿去如翦

題中實秦淮避曦圖

荷香迎簾開花氣到枕溼鴉鬢三四姝紅樓百千尺樹簇蔭
山青橋界秦淮碧君看十里波中有六朝血

和中實無題詩四百三十字五平五仄體用一送全

韻

蘭皋三春遊蕊館十載夢高臺臨芳衢遂宇閉曲弄行雲鴛
鴦樓映日翡翠棟珠櫳開流蘇寶髻覆錦幃羅襦干枝花繡
額五色綬青琴初調絃紫轡忽引鞚吟儕紛招攜靚侶自伯
仲才人羞邯鄲估客陋楚贛窺筵花雙行佐饌酒幾甕衣香
圓爲雲燭爛散若霜權迎按雙縉量淺笑一鬪欣偕延年觴

競食益智糗持螯調須薑薦鯉雜以蕪盤呈駝峰肥盎貯鴨
足罍唇分檳榔香手摘茉莉送迷藏尋無方拇戰屢不中繁
聲催鸞絃曼響逗鳥喁前歌方闌珊後曲遞引控橫波彌慙
憐笑語自諛詞千金憎雙嘖六博佐一哄扶釵窺鈴鳩解佩
惜恹恹斑紅鵲逾哀褪粉蝶乍狂低眉思餘懽賣眼遞隱衷
鬢歛郎爲扶鏡暈婢可礪簾垂空聽狸被窄亦裏鳳同心朝
偎寒半臂夜怯凍更闌嗔鷄鳴日出妒燕闌花明牕無塵蘇
補砌沒空心經鸚鵡調肺熱荔有貢芳韶何迢迢墜想若曹
曹鸞巾香畱痕麝裊薄帶湮雙鸞嬌橫蛾一水媚合湏澆愁
河無靈鑄恨嶺有陟三星殊迷離百兩忽頃綢飄零原無端
豔羨一已眾絲牽靈蛛愁鼎熱睡鴨痛題襟春迴波汲井夕
沒凍長吟鶯鶯詩莫賦簡簡慟層櫺籠輕塵閉幕有積松生

含桃花窈穉葬受燕子贈栽花今成谿采藥昔入洞千齡母相
忘一賦擬託諷無題空踟躕有淚莫慙恫

湘陰縣

積氣擁飛樓愁心耿江國樹影出千家湖燈非一色波長嶼
漸隱雲暗天始墨擊楫度通川維舟感茲夕行騰百餘里悠
悠睠靈匹夫君鬱時痾微契在騷賦運迫道則豐邦危志可
擇迺知鵬止座遠媿鵬培翮遺編觸孤憤荒江睇瑤魄慙非
鸞鶴姿思飽蛟鼉食申章悅嘉侶川塗負無極

謁武昌曾文正祠呈鄧保之丈

時丈方受南皮公聘分校兩湖講席

危樓鬱層岫靈區闕巖阿大江與之來浩浩東去波湘鄉古
皇哲楚寶相觀摩連檣下金陵氣鬱千蛟鼉乘時道以濟屯
會才何多名都阨飛輓堂殿今巍峨負接百世儀感茲眾賴

和白日不可繫疇云挽江河

楚學鄧夫子經廬息餘吹元覽抱六州宏簡綜百氏貌已牛
蹠泔翻覩鵬搏異蘭芬一以扇韋編孰云墜嶽嶽張尙書禮
堂接高轡羣才川赴壑眾響飆出地罔恩日撰杖承風睠孤
寄去去靡所依江皋鶴空唳

小姑山

大姑踏湖來小姑截江立青冥何迢迢闕此神女宅巖妝刷
昏黛林鐘逗空碧衝焱撼驚湍積翠變朝夕我行日東邁纓
塵挂傾壁心疑媧皇鑄魂其天吳慄彼美瘠不言懸潭有蛟
泣

張治秋編修文出眎先兄伯翰戶部詩札數十紙藉

錄成帙賦詩志哀

平居志海嶽忍甘貧賤倫。竭來走燕薊頭髮隨飄塵。阿兄一
云亡四海誰與鄰。車編墜浩壤蕙問凋窮津。大雅代不作憂
端送乾坤才豐道以殖。運迫年爲述百年湘上巖。遺茲蘭蕙
焚蘭蕙重已矣。遺鑒頒國珍幽塗倍寥夔。痛哭何由陳陸匪
感知己張霸嗟同羣。躬推奉德喪重以申屠。恩黃墟翳夕返
白日隨年昏。遺徽荷嘉貺。旅館悽營魂。羈懷睠蒼昊。銜恤無
由伸。

疊飲毛寶君員外宅兼贈喬茂葵劉鎬仲兩主事次

悼先戶部兄

黜魄生庭除迴焱激元抱鴻低碣石野駝齧桑乾草予懷日
耿耿君義彌皎皎相看一萬里那得華顏好。喬劉當世才儒
林並奇藻名高道以永服闇時爲寶存身比祥龍捐脰企飛

鳥高蹤厲芳塗嘉會合清醪微冥信多幸結契青霞表

湘皋望鱗羽神劍乖延津雞栖長安道朝夕猶一隣悲風
鷁鴒原百鳥號其羣靈局一己謚達義茲隄昏亮哉三子徒實
與農部親連鑣執宏簡抱踵來儒門分張各異域促坐懷靈
芬矧子恩紀良勸學爲諸昆常懷野馱駕服彼都莊輪餘歡
不可作千載爲霑巾

易水

振轡臨高衢迴流觸廣漠東莊暖餘暉西陲帶斜薄邁子易
水陰遠睇任邱郭驚蓬激大野駭獸無由託白日行燭之萬
怪走且卻天矜祖龍變地受羣羊搏羗茲七尺軀甘界一邱
貉山川亘虹蜺日月千鎌鋸遺忠皎匹練息鞅悲寥霸皇哲
一云負橫人啟其鑰悅懷千載餘去去空延屬

望嶧山

背郭望嶧山車路何逶迤羣眞輦怪石洞脇青冥陞皇風偃
夕秀嘉樹搖參差東抗琅邪臺北枕泰岱維祖龍毒四海刻
石爭厓屨行行緬岡巒靈貺歆在茲霜郊振孤轡眾壑含秋
曦杳已山上桐邁彼竈下炊末世無夔襄元音闕中旗亭亭
植巖壑鬱鬱傷道尫纓塵不可濯窮睇天一涯

利國驛登礦務局樓望月

雕甍玃清輝雜樹圍芳郊霜嚴汀鴈息霧慘街柝囂橘柚隨
序榮螭蛄從我號肫魄耿千里靈匹期中宵樓陰界竟徐一
碧分迢迢北風吹馬塵南顧懷以勞役煩肌悴栗道遠髮刁
騷揮袂逍遙臺振鞅汴泗交遊已思眞人山川雄我曹地寶
重不惜神皋終見凋片言促羈羽迴睇蒼雲高

徐州

嚮夕投彭城眾峰互環郭川涂昔交薈南北爭聯絡樓星堞
共遠閩語人俱作駕轅齊與魯繫檝汴逾洛名都隳阨塞雙
洪帶林薄峨峨戲馬臺髡柳萬株弱中原窪一隅飛輓於茲
託祇今大纛雄坐控江東鑰漏巖霜更促牖暗月虛掠行歌
江海勞冥攬戰爭略范墓劍可尋黃樓爵須酌遽然曠世懷
去已天南鶴

夜下江陰

輪舟不用檣千里下吳鄉夜見江陰郭東浮海氣蒼長風吹
大月倒貫赤龍堂千艇橫空渡呼儂各一方青山催戍鼓白
嶼界扶桑待剪吳淞水心隨五夜航

七星巖觀石室

巖翠削不一天躔鑒無形排空妒鬼腳突兀來相爭攀蘿勢
已岌越澗行爲傾神光裊一綫悶響騰千靈胚胎苞萼同雜
沓金鐵鳴低縋赴幽寢高蹲睨飛薨羣峰畫合還詭變殊陰
晴偉茲一室秀竊若羣眞迎谿谿乍得牖隧轉初如瓶元窻
忽開豁百籟紛琤琮黝深萬夫腹一礪中虹橫扶磴就日影
殘鐘出元冥星浦墮層白崧臺凌空青手剔北海記目眩南
離精聊因息神役塵鞅徒屏營

連州出峽

夷鞦韆荒忽冥覽獨奇吒抽帆曉背郭身礙天一罅鼉槌百
靈疾犀吼萬人射石髮猿不梳苔鬚鬼可怕谿谿洞如腹尺
寸巖見豁神斤歛揮霍鳶站共呼嚇雙厓合步障斷壁亘修
架險當一夫塞銜類眾女妬瘴母未墮秋炎公正驅夏高攀

鼠穴鳴低眩龍宮嫁三朝峽互變百里鵲爭逗膏黛嬉冥姦
樓薺列空舍昨來舟泝峽吁目各嗟訝牆腰竄蝙蝠寺腳森
蘭靡青冥排積鐵白練懸孤垣帆力無所施纜勢猶可借不
圖順流楫角距不相下書如刀畫塗脫若箭離弣僊人臥未
起貞女鬟初卸瀑多晴轉雨巖偏畫爲夜鑿空嗟無方搜奇
日靡暇軫茲皇風暢復以民力藉雲局偉豹變蹠涔得龍
化輦戶闢桑麻神祠侑燔炙去來四句兼向背一州跨飄迴
博德旗雲黯昌黎駕雄心隘江海灝氣卑臺榭聞歌蜚族馴
問俗猺酋詐戎戎嶺色深鬱鬱天容何當息纓塵歸學樊
遲稼

逃石

水經注利水經靈石下一名逃石高三十丈廣圓

五百丈太平寰宇記逃石一名牢石本在桂陽迅
雷一夜遷此舟經其下靈翠眩目紀之以詩

乍開利水颿條睹牢石異窺天俛其頂輓溜受以鼻湍鳴就
坎止輟駁奠離位鬼腳一千年雷雨破空翠顏森太古缺穴
走層江魅樹滲黛戕戕落懸髮蔽蔽圖經事髣髴逃形變遺
蛻廣圓丈五百桂陽失雌羣鼃鼃阻不驕日月駭相背一帆
紅鷗鵠潛影掠溪媚偉茲神靈幻孰測乾坤祕它日揮靈鞭
驅之還嶺內

九日登廣州五層樓

重峭控飛薺裊海嶽一粒羲娥抱檻來與客相拱揖樹簇呼
鸞岡嶼幻靈羊脊戰雨龍挂帆引入鷗坵艤東西香澳雄幾
變腥臊國如何四夷守但見番檣列涼秋入睥睨靈館白孤

躡倪悲人事窮仰眠星河接狂飈墮吾巾嘉會羽不翕越禽
序戀煥湘鵬思就溼局促四海塵高冠而獨立

湘灣阻雪書感

出門乃爲家入門翻作客行旃三萬里始覺天地窄凝陰阻
歸航雪意殊不良灑我髮上塵皴我面上霜湘人在何處湘
岸橫無數天凹水邊樓地凸沙頭樹嗟予漢陽來知有潭梅
開近家望不見魂共三閭吟三閭卜居所歲暮貧如我水底
白龍堂破屋陰陰鎖悠悠復悠悠漂寄如鳬鷗去日尙年少
歸來愁白頭

感時述舊六十韻贈趙知縣上達

君家方廣深我住湘水陽白日行墮海青絲捫有霜州閭負
千里不閤猶一牆子食樊口鰈子騎僊嶠羊大江一何雄翹

魃爲子藏重溟一何深蜃蛤涎子牀五年不相見相見別苦
忙靈音睇天末我鷗子則凰噫予適燕薊有夢升子堂子起
漉我酒驅車經太行朝躋碣石館暮宿宣武坊雄文屢千辟
橫出如王將天閭一夔剛文囿百怪翔星槎捫枯朽日馭悲
蒼涼涼秋八九月傳舍趨炎荒鮫人夜披髮軫我無衣裳手
持雙鯉魚謂君遊武昌僊湖巨匹練飛作南樓梁因之夜夜
夢得到君子傍嗟予飽蕙苴療食愁枕椰面目日深黝胚胎
貢飛黃何期與君遇蛇年龍不臧湘廬八百樹樹樹秋聲狂
泗鱗隘蘭渚瘁羽思梧岡誼宅識柑菊蛻塚薶梨棠歌遙黃
陵女曲和白石郎方秋告邊警宰相百不妨東方出千騎齧
海無枯桑盟塞南交雉部喉東封狼我皇一再怒誓復
句驪疆犀分海波嘯獸挺胡沙揚未容手足痺詎耐背項瘡

天兵百道集捷書騰未央東倭儻禽獮西俄無鴟張遂呼元
菟月共飲黃龍觴吾儕竟何爲邁此奇窮鄉東西九萬里奔
走迷其方疇昔賦從軍子年三十強雄關轟銅柱一戰收邊
陲是時黑旗眾可奪紅海航天戈遽云戢歸臥無餽糧我有
琵琶絃子彈一再傷相傷渺何許楚水無明璫歎如青冢魂
隨螢來建章又如潯陽婦背客羞啼妝汾秋歌白鴈帳黑飲
黃糜一醉發狂嘯有詩撐我腸座誰中聖人奉以玉醞漿子
飲我斟酌子歌吾激昂湘纍睇楚笑匣劍騰吳裝偕聽洞庭
樂直下江水長漢江起朱樓夾道多名倡便娟者誰子裊娜
矜垂楊窺簾媵愁隨墮鏡勻朝光傷哉箴中鳳不敵河上魴
吾徒例陸湛契合形則忘君看大九州生死聚一邱死尙戀
華屋生誰忍糝糠猶森七日厄河伯殊不良哀吟晤君耳目

墮江茫茫

時同阻風鹿角

夜起

泠泠澗上絃汨汨松下井誰將東牕月掠破西堂暝微風出
庭樹落葉聲初警滅燭畏無眠虛幃鑒清冷一蛩鳴何爲秋
氣撼之醒每懷當露晞待覓滄浪艇

楚望閣詩集卷二 星

受業

會稽楊道隆東鄉羅澤駒

校字

楚望閣詩集卷三

甯鄉程頌萬子大著

七言古詩

新燕篇

有序

在昔三百篇之旨推美二南以男女歌詠託辭比興
平中愉樂之音被諸管絃而化邦國迨樂縣失攷
士夫之德性日漓於是乖戾忿恨之氣積發爲憂
時指事危苦動盪之辭視男女歌詠嚶鳴愉樂之
音幾若可廢而詩之教遂不得比隆於禮風教遞
衰元音凋喪毋惑乎三代下治日少而亂日多也
予年十五寔作是篇先兄伯翰先生見而詫之曰
此身之元音雖藝成亦無以過旣予讀何仲默

明月篇詞旨穠麗音調流轉予所弗逮此稿遂緘
篋中後十餘載復加審錄乃知仲默外子美而內
王楊是爲得聲詩之正予辭凡弱無當大雅而性
情之道毋或盤焉序而存之以俟知者光緒庚子

三月

桃花初開柳絮飛卷簾遙見雙燕歸沈沈簾幙東風靜舊時
王謝尋烏衣烏衣舊主偏依戀閒庭春靜人初倦慣把泥銜
玳瑁梁那堪釵擲芙蓉院風雨迷離上巳時夕陽紅上海棠
枝去年曾與青絲繫今日歸來碧草滋紫陌香塵春未老巢
成苦見鶯囀早呢喃兒女總情癡澹沱輕風太嬌小嬌小情
癡春晝長阿儂偷喚玉真娘誰家庭院銜芳草何處人家伴
畫梁瑤光當日憐星散化作青衣墮銀漢唐殿宮人匣未開

璇閨美女魂初斷，匣開魂斷，總虛無。繡箔珠簾，映碧疏年年。
歲歲燕猶到，歲歲年年人不如。雕楹畫棟，過寒食，羨爾飛飛。
雙比翼，冶春陌上，漫相逢，斜日簷邊軟無力。陌上簷邊，思悄
然花朝又過，豔陽天可憐。掌上頻教舞，莫向幃中獨自眠。斗
帳輕寒，破香霧，裊裊高下頻來去。肯學鴛鴦對對飛，休教蛺
蝶雙雙妬。雨絲雲片，最銷魂，翠羽雕闌怨曉。昏愁絕，江南人
去也。杏花春雨，雨閉重門。

采菱行武陵西陂作

蘭煙瑟瑟波容媚，花壓溪頭錦鴛睡。楚王宮畔細腰多，湘波
照臉千蛾翠。十五娉婷說綺年，花嬌不語暗相憐。戲分蘋葉
初持楫，斜撥菱花坐刺船。船低露重羅衫溼，雙槳輕迴弱無
力。中婦青樓臨水開，小家碧玉傾城色。船尾掠波波影低，船

頭堆花花葉齊香多語密盪舟遠子夜路迷何處谿紅泥亭
子湖邊築向晚菱歌聲斷續儂家采得並頭蓮三五攜歸大
隄曲隄上誰家白馬郎鞭絲嬾娜拂垂楊紅樓隔水夜燈遠
此夕相思空斷腸

寄郭文學二首

聞君昨下洞庭水十幅蒲帆日千里揚子潮生津吏迎海門
月落鐘聲起花發黃陵聽鷓鴣樹深京口賣鱸魚白頭詩卷
無人和還作東吳一酒徒

明月飄飄出東海天邊客子今何在醉汝桃花洞口霞太息
流光鬢毛改西飛烏速東馳波夢中髣髴同山河海天愁思
亂如髮白日相思空浩歌

武溪深行酬閻季蓉

君歌武溪深武溪日暮愁人心壺頭山色陰沈沈倒插晴江
白玉簪善卷臺前不可住拏舟徑入溪中去洞口桃花一萬
株濛濛不辨仙源路朝下白馬灘暮入綠蘿巖巖前枯松倒
江立一夕化作龍飛來金枝翠蕤相映開仙人跨鶴雲中回
共君巖前一招手醉覆溪南三百杯會仙橋頭暮延伫青僮
倦歌鶴起舞天風吹斷白琅玕瀑泉倒挂青冥雨與君三月
瀟湘別君向峰頭踏明月如今歲序變炎暑縱有羊裘披不
得新詩遠寄潭州來空齋晝讀如冰雪我謀采藥娛慈親南
風孤櫂湘江濱衡峰迢迢不得上衝飈吹斷南天門夢中惘
恍若見君同騎白鹿招紫氛煢霞飲露不知處七十二岫空
嶙峋我歌湘水深君唱武溪曲白日相思空斷續君今結屋
空山獨空山冥冥愁薜蘿猿鳥晝嘯悲風多百年日月空蹉

跼吁嗟乎百年日月空蹉跎今我不樂當奈何

長江圖

岷江西下如龍蛇千盤百折經三巴三巴之水更東注便兒
龍蛇浮海去黃鶴高樓俯逝川孤雲迢遞客心懸何年醉臥
三山頂目斷東南萬里天

長安行寄易郎中順鼎

長安三月花如雪鞭絲嫵娜垂楊陌東風此日太無情吹人
直向燕臺別燕京駿馬五花裘譚笑能傾萬戶侯芍藥臺前
花滿樹櫻桃斜畔月當樓此時醉把金尊酒此時怨折蘆溝
柳茫茫愁思海天低一鴈關河莽回首予亦辭家臥武陵青
山常對髮鬢髩寒潮洞口雙停槩斜日湖邊一朵菱別君夢
君情萬里日日愁懷那得已黏天碧草望青門相思恰似春

江水桃花欲落沅澧寒美人玉立青琅玕但使才名盛京國
莫教顏色老邯鄲尋常朱紫原非羨諫章欲奏麒麟殿海上
軍書夜夜來天涯人事朝朝變十載春明夢裏人衣衫牢落
感緇塵江樓昨夜逢歸鴈爲寄迢迢塞北春

宣宗成皇帝御書印心石屋歌

并序

印心石室鄉先達陶文毅公蚤歲嶽麓讀書之廬

公以兩江總督拜太子太保入覲

成廟垂詢舊學並及斯廬仍舊額

賜書四字公以賜字視額未滿復跪求

成廟擘窠書得俞所請諭曰

宸翰下頒並命摹刻嶽麓山今響鼓嶺側印心石屋之

御書額也

頌萬

讀書山中仰瞻

聖藻歎昔賢際遇之隆慨致君之有術恭賦柏梁體六

十二韻追紀其盛焉

宣宗御極臨萬方亘若鼉旭升樽桑陰暮蝕精旄芒廓清
八紘恢土疆竄獫狫寒谷回春陽萌枯茁朽鬯大荒覲類羣后
紛賡颺鯨鸞佩玉鳴鏘鏘方叔陶父民之望江東杖鉞和雨
暘百年天塹毋跳梁四境民物熙洋洋殷見報最朝 天閭

帝曰汝澍惟賢良嘉乃丕績茲褒揚錫爾秬鬯榮蒸
嘗庸爾蒲穀奉圭璋拜手稽首丹墀旁感恩流涕交淋浪願
祝 聖壽川嶽長升恆日月懸金湯 帝咨臣里微

時莊廿年劬學明經常其在靈嶽其蒸湘藻楣見志應弗忘
表曰臣澍夙學盲患知患立中允臧亦有石屋林巖藏署題
印心殊忤慚曰朕賜汝紫宸章貽厥孫謀篤其慶黃門捧出

青琳瑯印心石室梯錦襃臣謝拜舞顏悚惶曰臣昧死邀恩
光肇窠宸翰大且昌重乞奎藻榮嚴廊天顏有

喜志可償雲移雉尾鳴鸞瑞公孤下食分鵷行豹胎麟脯揮
瑞觴詰朝奉詔封麻黃勅賜汝澍特典彰萬幾楮

翰瑩輝煌筆從心正何堂堂執如威鳳扶翱翔矯若神龍紛
騰驤驚定舞蹈神感傷恩高望厚隕越防每懷返鎮鬢髮蒼
東南王事勤勞勤堂高畫錦銘珂鄉一時御墨題雲房

湘東勛閎傳青箱棖題鬱翠崇萬祥鐫珉樹比中山坊雙螭
詰屈蟠靈皇琳宮丹壁永護防梗枿杞梓松柏楊交映結互
壽未央小臣願學希子張奕葉天步惟樂康

題清湘老人蜻蜓葉圖並序

圖中蒼巖古木江氣迷漫一客掉舟中流容與自

題絕句曰花甲餘年買箇舟
嬾將姓氏出人頭
偶然有句間文字又被風吹到九州
戲學蜻蜓傍水涯
從今款款不須家
老夫眼窄何由放出沒無蹤
點浪花此圖著錄楊翰歸石軒畫記余見於武陵
賈人索值甚昂因題以還之

雲氣濛濛不可辨
一葉蜻蜓落江面
白鷗出沒迷所之
萬里長江天一綫
江邊古樹多悲風
放釣卻入菰蒲中
天寒霜重木葉脫
霞在晚楓紅
處紅帆欹舟窄
波浪闊隨意煙雲盪
寥廓橫風吹雨勢
未成定在峰腰與山腳
長沙賈客示此圖
老人遺蹟天下無
空堂匹練掃雪壁
坐覺咫尺臨江湖
高人綿邈不可測
萬古山川都破裂
卻從雲水覓生涯
尚有魚鷗舊相識
曲罷滄浪無限情
君山倒影入空冥
題詩莫慰靈均恨

明日揚舲過洞庭

乞何詩孫舍人繪桃源圖

我聞神仙自太古桃源咫尺無人覩
舟行百里看山色夾岸巉嵒束門戶
來攀絕頂凌嵯峨俯瞰百尺之飛濤
石扉扃空嵌瑤碧何年古篆窮鐫雕
下行石徑天昏黑橋畔方亭跨虹碧
老僧迎我入院門古苔繡滿庭前石
呼僮烹茶揖向客白日隱隱沈江色
江色山光澹欲無仙人別我洞中居
昨夕林風腥虎血朝看猿狖驚人呼
翻悲方朔豎子耳辛苦偷桃白雲裏
儻知湖外有仙源不妨乞種桃花米
仙徑迢迢不可攀居人豔說武陵灣
明朝乞得何郎畫髭髯煙巒指顧間

武陵觀漲行

洞庭新漲浮晴雪西滙朗江蛟鼉穴
潮打空城白馬來颼颼

風撼波濤立龍爲馬兮雲爲車仙之人兮駕鸞輿長鯨吐兮
金蛇趨來班班兮去衙衙虹橋蜃市浮泱泱煙光柳霧相滉
潑半江金碧浸迷離倒湧德山三十丈洪流漾潏天滌潏閃
電煙霾鬱落暉疊嶂層巒失翠微樓臺欲倒將焉歸倚闌俛
視若無底人影倒挂蛟應喜長天月出眼初醒暮色蒼茫青
復青

祭詩辭
甲申除夕

閑逢酒灘歲旣告遷乃啟素幕羅琯筵手漉玉斝鋪瓊榆酒
徒翕羽爰奠於詩神之前窮衿冥冥蔽簾隙素霜冉冉生華
顛嗟汝神兮或寥囑於環瀛九萬餘里或盤鑿於混沌十二
萬年成周王化一以熄乃得孔子而刪焉六雄旣并祖龍死
惟神顛蹶遭播遷大風歌嬪柏梁詠古意十九爭畱連橫吹

燕射嗣郊廟清商雜舞稽陳編江山六代互藻麗四傑突起
鳴歌絃由來子美號變雅詩聖雖出風人淹長庚星芒劇睽
睽王風蔓草心惘然三唐羣英會颺舉汝神寔得騰越於翰
墨之淵厥其繼武惟有宋堂皇閭奧閎萬千涪翁險勁放翁
肆眉山大博藩籬捐元明復古數耑詣二青青田別共茶陵
賢筵撞桴應迄 昭代王吳夕秀爭蟬嫣風騷晦冉二千載
詩禮不復同賓筵吾觀天地陰陽詩之消息山嶽詩之骨川
瀆詩之血風雲詩之精氣霞綺詩之顏色星斗乃詩之光輝
草木爲詩之毛髮觸其聲兮金石鏗鏘激其詞兮波濤鵝立
嗟汝神兮或佚盪於愁城或沈埋於酒國或友麋遁跡於空
山或葬腹行吟於水澤或玉妃捧硯以陳辭或鐵馬橫江而
弔月羈懷浩蕩不自知悲喜窮通歎交集醉中筆撼五言城

興盡榆橫一斗墨悲來平六義膏盲四始愁古今升降等浮
漚相攜孔雀東南詠憶織流黃西北樓迴風大海紫瀾發明
月遠嶠靈胎游疇云閨化本愉樂嫺彼情性騷溫柔樂縣旣
廢詩亦燼競爲蛙鼃爲鉤輅江山體物謝奇崛並世豪俊成
冥搜昨夕衝飈搏大雪今朝破屋任低頭詩仙詩聖悅惘若
相遇詩妖詩鬼聿兀將焉求今將送汝於糟麴之鄉荒漠之
野猥蹲蹲兮晝歎鬼狷狷兮夜覩酒徒磊落奠尊醕詩之靈
兮翩來下共擘鸞觴饌麟脯風獵獵兮夜茫茫滿堂銷黯燈
燭光酒旣醉兮人亦狂扣門茶壘相扶將君不見東晉死陶
潛亡亘千百載詩城詩國何荒涼謫仙捉月自鹵莽退之送
窮徒愴恨世間大雅久不作誰歎可歌可泣可興可感之作
千秋汗簡直儕孔壁金絲堂今且慰汝詩之靈酒氣直挾詩

魂醒浩蕩蕩兮渺冥冥詩之去兮駕雲軿我將從之游帝京
支離飄泊非所名溫柔敦厚教乃成看取汝神三萬六千日
如麟之在囿而鳳之在庭

詩孫病不出飲戲柬

雨聲瀟瀟打窗紙晨烏啞啞啼樹起闌干欹側畫簾深梅花
凍破銀瓶水爲報城東病酒人茶煙禪榻苦吟身詩魂瘦怯
東風嬾孤負城西一甕春

題石頑老人指畫竹石歌

老人姓羅名炳字穆卿隱
桃源二子並能世其家學

畫石如畫雲畫竹如畫龍一竿兩竿盤瘦硬嵌入石罅皆玲
瓏國朝畫師指代筆且園以外無豪劇墨魂離合本無痕
側勢斜枝態非一蕭瑟空齋風雨鳴力劃紙背指有聲若削
若剝峰突兀忽疏忽密枝縱橫指尖衆妙難殫述古苔壞碧

頑雲青吾聞綠蘿峰巔多異石五色通明漾寒碧又聞方竹
亭中僧夢涼幽篁蔽谷吹僊香先生畫本真奇絕家居亦近
秦人宅平生瀟灑軼風塵畫圖自署逃禪客天涯憔悴識機
雲一幅生綃指爪痕髣髴西湖僧院好竹枝斜倚石床溫

題石頑老人畫梅冊子

先生畫梅二十冊拂卷淋漓太古雪一陣東風天上來曉窗
晴畫江南碧僊僊倩影掩紋紗虬枝欹側含義牙人間香夢
杳無跡盤空拗筆撐靈芽花魂低顛銀瓶冷墨痕沁入屏山
影幅幅迴環各擅奇畫理詩心俱絕頂澹濃肥瘠有殊致或
爲枯槁或幽媚昨騎蝴蝶訪僊源先生尙倚苔茵睡但畫梅
花不畫春卷中疑有高人魂三間小築武溪上門前溪水流
寒雪誦芬令子攻金石風雪蕭齋景遺蹟瘦骨生憐月二分

新詩如化雲千疊忽憶瀟湘舊住村竹籬茆屋破柴門何當
近古荒園裏

先生所居自署近古園

日日花前共酒樽

祝融峰觀日出詩

噫噦乎吾聞祝融之峰九千八百餘丈之崔巍其旁乃有觀
日臺我來絕頂眺六合惟見純青一綫遮蓬萊是時五更秋
氣肅萬壑陰森搖古木山靈喚我起向東赤崖一角吞鴻濛
初疑電母掣寶鏡靈光閃透鮫綃宮千里萬里顚無極層冥
步障春霞紅繼如火龍款掉尾祝融燒破蒼雲紫侵曉天鷄
噓一聲塵寰白霧濛濛裏以天爲海海爲雲海波界破天無
痕層崖陡倚萬仞碧待日不出心紛縕須臾靈鳥忽跳擲已
到天邊卻傾仄陽候虹靺過蓬壺瘦蛟不舞潛虬立峭波如
壁迴驚飈淫淫潑墨連犇濤雙瞳卻立不敢騁赤輪倒射金

沙搖層驚疊險聚一瞬奇詭變幻精靈交僊壇初曜眾峰合
芙蓉天柱薶雲腳南天門上一招攜炎曦萬怪來紛還下界
山河幾點煙我今俛眊心茫然燭龍衙衙炳八極搏桑舊夢
非人間琴次天風富遙響雲璈聲戛峰巒盪得毋玉女控瑤
輶或者嶽靈通胖蠻吁嗟乎蟲沙厯劫皆渺茫今得僊靈挾
我壽嶽之頂南斗傍元精耿耿貫胃臍鈞樂隱隱聆霓裳海
上三山歸不得揭來還作瀟湘客它年踏雪向昆侖應憶衡
峰觀日出

寄何舍人京師

尚雲在簾花在几夢去京師五千里靈溪月黑蠻天高夜深
猿鶴求其曹殊方歲月鬢毛改子身亦墮萬人海千金駿骨
世所稀少日聲名動朝案薊門煙樹湘江雲吾儕意氣凌風

塵笑余二十不得第幡然遠作諸侯賓邊徼山川喜清肅太

守廉仁天所嚮

張知府抑仲取莊子語署所居曰天嚮閣

且從王粲賦登樓何似

馬卿文諭蜀飄零倦客空蹉跎邊愁一曲聞夷歌因君忽憶

武陵客酒徒寥落今無多人生聚散原鴻雪何時共踏蘆溝
月吟魂此夕向長安莫遺關山限南北

百八灘歌

靈谿一百二十里直下王村疾如駛其中一百有八灘灘勢
盤拏若銜尾兩崖森森高插天怒流觸石爭回旋或如雷霆
搜鬼怪或如劍戟搏風煙或如靈犀避弩撼臚舳或如哮虎
裂背吞腥羶或如神驥犇騰下天極或如渴虹泥飲窺長川
舟師握篙不肯住其下乃是蛟龍淵一灘一石相鉤連灘迴
石轉如星躔有時雙崖裂忽合舟行乃自巖中穿迄無一里

半里平但覺千端萬族搏噬聲喧闐我來靈谿三四月閒關
鳥道攀援絕頗聞此谿險百計窮飛越昨朝送客來溪頭灘
師纘發誰能留松猿冥冥眾壑靜陰旭杲杲千崖搜令人臨
淵各魂悸頃刻性命輕懸旒西南奇險忽覩此鴻濛鑿破天
爲愁當年樓船下漢將征蠻銅鼓來天上祇今郡縣闢蠻陬
負嶺谿酋失神王君不聞瞿唐峽五月舟停不敢發君不聞
惡道溪摩崖字勒天下奇我今欲渡愁無策身來百八灘前
客歌聲夜激猛岡河蠻月無情燭花黑

清浪灘

北河羣灘失魂魄沅陵縣前看山色狂風吹浪浪打人瞬息
征颿留不得凌晨擊楫清浪旁兩巖戈戟森羅張江身萬石
鑿不斷如虎如豹如羣羊濤聲怒捲人聲洶灘神故試篙師

勇船欹舵轉萬箭發眾鬼招人各驚悚橫衝白浪如帆齊巖
尖互攫船身低罅開急使六丁入倒曳巖走迷東西千湍百
折勢若阻一綫鴻荒翕門戶似欲留人不放還連山遮斷蛟
龍舞廿里漸過灘始平榜人喜賀爲揚舲迴看潮頭怒未息
髣髴銀槎天上行蠻中邱壑多奇賞旅魂暗逐潮來往辰陽
斷岬暝猿啼自鐫詩句蒼巖上

題寄禪東遊詩集送歸衡嶽二首

羯來狂歌誰最顛寄師昨泛東吳船匡廬海色一千里詩心
欲盪蛟龍淵語予挂錫經行處月落蘭皋鴈飛度一葉袈裟
萬里舟芙蓉露萎江南路

祝融九疑好晴色舟子招人畱不得草短霜乾眾壑凋壞色
山門舊苔跡白香老人相並驂青鞵蒨笠天東南從君五嶽

歸來日翠嶺松濤白石庵

白香老人同遊有倡和集

贈王景崧兼寄王景綬永順

湘山之巖風怒號十日雨氣昏林皋王生別我卻歸里布帆
穩挂荒江濤子生陸沉常作客與子相逢岸巾幘千金駿骨
誰復知秋風同鍛文章翼君家軾轍人中奇舍人楹帙垂宗
彝尊甫懷欽先生離羣一鴈渺何所蠻江水縮霜天低霜天迢迢變
重九一夕愁雲黯南斗分攜相憶洞庭船不堪重贈江潭柳
黃河之水難煮愁瞽儒投筆皆封侯賈生痛哭阮生笑意態
公然橫九州茆檐霜乾白日短萬事無成一詩嬾贖欲招尋
楚雨生割鮮夜進玻璃碗短鬢青衫半酒塵天涯有客感靈
均他時若理滄浪櫂重檢新詩話楚雲

長沙春遊曲和贈易中實

湘春門外行人稀薄衫窄袖縫春衣愛聽紫陌鶯囀好初見
紅樓燕子飛綵燕雙飛高復下倚廊莫放春愁冶幾處珠簾
欲誤人幾回白袷親調馬側帽疲驢江上春香名曾喚作春
人不知綠鬢年年減惟見桃花歲歲新年年歲歲尋春侶暮
暮朝朝懺愁語金谷曾辭洛下塵玉驄又繫湖邊墅芳墅湖
邊號蛺蝶園吞花臥酒看青山雅才今日推雙陸樂府當年說
四蓮河東雙戟高門第南樓賓燕同傾醴茗酪應傳天寶奴
笙篴競學延年弟燭彈花闌語昔游十三回入海天秋鳳闕
曉光依日下鯉盤春水薦黃流少日功名須稱意繡衣持節
文章貴但使鶯花解笑人未須琴鶴貧爲仕倦仕驚看近日
容相如惆悵舊眉峰啟君匣裏雙菱鏡送客江天七寶鐘江
天隱隱紅闌色定有春魂倚闌側來日還須拂錦韉與君買

醉垂楊陌

中寶詩自注
渡海十三次

題中寶林屋披嵐圖

因爲太湖遊乍轉包山道東風吹夢入仙家
七二芙蓉落杯小梅花萬壑白漫漫中有巴陵道
可還莫訝一雙行腳倦來窺第九洞天寒

題中寶西泠語煙圖

撐舟橋外煙濛濛月色欲墮花迷空十里五里不知處
人語乍尋南北峰西泠清絕西湖上紅衣女兒雙盪槳
放鶴亭前一結茆從君自署西泠長

長句送中寶遊衡山

昔君寄我栽眉詩雪山雲海光離奇是時我方入衡嶽
嚴霜九月寒無衣蜀江雲樹五千里君帆又向東吳指
一官豸繡

入中州萬里龍門控河水十年空賦逍遙遊欲簪六合無雲
浮定王臺前一招手相逢醉倒城南樓長沙城南十日飲楚
中曰古多靈境笑呼天外祝融君爲尋江上漁郎艇南天門
上山層巒芒屨布鞵天邊來芙蓉紫葢落杯底水簾瀑布迎
人開天鷄一聲叫海月起視東方乍生白眼中人物纔若拳
足底山河細如髮廿年楚寶多英雄東南浩劫銷沙蟲未許
仙才可招鶴儘教豎子皆成龍此日題詩嶽中寺定有精誠
通積氣同是飄零物外身且看浩蕩中原事倦遊身世殊可
憐攀雲一榻南斗懸子由與我各年少舊題詩在峰之巔爲
君指點雙行跡夢入千巖萬峰碧他年我亦挾君詩西行飛
上峨眉雪

乙酉偕君弟叔
由登祝融峰

楚望閣詩集卷二畢

受業

陽湖洪忠

校字

海門周寶辰

楚望閣詩集卷四

甯鄉程頌萬子大箸

七言古詩

夜坐

小齋兀兀如輕舠詩魂夜偈哀蛩號霜風撼窗燭欲滅月色
墮地天爲高三更未闌僮已寢自起安罏煮新茗愁吟未破
鼠窺鐙簾外芙蓉一枝冷

乘輪舶渡湖望岳陽樓作歌

詩人作歌龍堂來湘山如舸湘如杯飄輪飛馳鳥不下坐見
二妃之廟三閭臺三閭臺前一搔首鯨波卷入平湖口樹痕
帆影與天齊懸梯乍可攀南斗洞庭之雄雄九州黔巫交越
皆通流由來天險匪易渡神鴉啞食鼃鼃愁巨艦橫飛三百

里洞僊鐵笛中流起鰕睛閃閃攫人行頰痕倒射鱗宮紫我
舟風力無所施奔濤怒走山爲移南船側目北船羨截江墨
焰隨風馳湖上仙人赤雙腳待余不至空蕭索一晌回舟見
郡樓好從東望招黃鶴鶴去樓空事有無長江東下海門孤
百年淫蔓無坏土私幸偏沅守一隅杜拾遺范文正登樓各
有傷心詠神山采藥竟無人痿痺不救中原病會招朗吟客
同揖洞庭君文狸赤豹來江濱大夫帝子皆爲賓薄醉尚可
三千春中年憂樂鬢毛改更欲乘桴蹈東海回望瀟湘一寸
天楚狂奇服靈均在

畱居文正書院奉別鄧彌之先生

白香老人健如鵠講學金陵山水窟金陵山水如公詩龍蟠
虎踞江之湄我帆東指三千里蛟龍攫食樓船底翩然卻泛

白門舟見公大笑掀髯留齋頭洗盞酌新醪詩聲怒撼窗間
竹公詩灝氣橫江河俗夫企踵行則頗我今屠龍二十載託
公塵外憐文采留公閣前宵擘觴簾櫳在水花在牀江皋樓
船暮擊鼓師友茫茫不能語東南矍鑠今幾賢老人述作猶
華顛山川文字莽寥廓可堪賤子貧無藥鐘聲催出石頭城
別公復作三山行幾日征帆海邊樹相思猶繫秦淮渡

秦淮鐙船歌爲上元王德楷作

王郎招我秦淮河酒酣索我鐙船歌秦淮鐙船三四里斜窗
畫幌圍銀荷是時五月暑未盛月魂滴豔搖星娥蘭楫迢迢
乍銜尾哀絲脆竹紛相和江南佳人白苧舞倚醉爲持雙鳳
鞦樓上銀箏樓下水一時映入鐙船裏魚龍曼衍不知眠夜
香酥透鴛鴦髓橋畔誰家白馬來蝦簾不捲風吹開倚闌相

喚別迴櫂柳株盡傍船唇栽隔座有人爭注目檀槽入破歌
聲促丁家樹與李家樓箇中相憶人如玉南院風流不計年
金戈鐵馬動江天六朝山色好眉黛兩岸河房嬌畫筵畫筵
眉黛今非昔廿載秦淮蕤白骨卽今鐙舫載魂來青天夜變
芙蓉泣王郎王郎須莫哀海天相望多樓臺誰尋舊院相思
地誰見新亭痛哭來我歌未畢君歌和玉簫金管相跌坐莫
是秦淮不肯流有人今夕詩魂墮

海上謠

海上瓊臺三百曲鬢眉夜瞰龍堂綠黑雲燒浪擁戈船天邊
照見諸番屋十條龍泣春空絲電光迸樹如雌霓垂楊踈地
寶韁脫矮鬚爭道香塵吹千樓網戶春蛾貼日高寒歛芙蓉
曉虹橋百轉礙珠櫺地衣黃罩琉璃月盤龍江上春潮來歌

塵蠟汐隨春埋島雲界作眾香國黃金鑄淚天傾飾玉盤珍
漣無人管醉魂又逐雷聲緩相隨覓羽下星河天魔舞倦蘭
荷短少年蹴鞠人中龍並轡語低蘭麝風三更繡句樹如畫
珍禽駭獸分房櫳春魂暗蝕袁崧壘地中火溢相思水脂簾
十里暈空潮滉香齧斷雙龍子歸來點屨開瑤樓海風割損
鮫人眸鸞絲鳳竹徹宵曙天吳暗泣冤禽愁赤睛獮吏街前
立白梃紅巾夜呼急茫茫十二萬年餘此間原是蛟鼉宅

煙臺海舶觀日出歌

黑波在山如貼氈赤波在海如曳絃我今東遊一萬里瞥見
仙人招手芝朶之島龍宮前龍宮萬丈沈沈鐵壓損金鳥不
能出帝遣金烏監九州天柱撐翻地鼇拆魯東門前飛海塵
樓航百道如山屯五更振衣踏蓬背海潮潑墨天無鱗平睨

滄溟纔一粟碧眼胡兒起相促須臾諸島各變見如鬼攫人
 人抱佛寥空碎白輕拆縣五色妖露吞中邊是時待日日未
 出天吳蝸象心勞煎燭龍掉尾凌空表失勢相看卻傾倒一
 綫橫摧太古波駭水屯空射羣島少時疾走天東來赤血湧
 現黃金臺迴看島國散如髮頰痕迸裂夫容胎陽侯乘蹻不
 計里飄輪怒激搏桑水青齊門戶轟天開海色茫茫變成綺
 亞細亞洲今幾何靈曦東部開山河潛虬吐霧渴龍死天公
 戲擲雙飛梭空聞秦始皇不見漢武帝黿鼉窟宅爭平地海
 外誰遺瑤瑁來人間只有金銀氣日今日兮爾踰墨嶺來正
 照昆侖脈窮邊幽暗鬼所寰尙說歐洲有城闕堯時大水不
 汝侵十輪燭照母中蹶會從印度開明堂東壇祭日西壇月
 鐙火平連黑水洋樓臺併失紅毛國狂生作歌來什載居洞

庭曾登衡嶽九千仞俯瞰日出騰空冥六合橫一白三山無
點青竭來乘桴入東海覲彼三足頑而靈徑圓千里儻納腹
世上百醜無潛形霞車虹勒落吾手掉頭直叩虞淵局烏乎
虞淵有客赤髮睛欲豆五嶽罇四瀛吾皇高拱百靈集魯
陽有戈揮不停神焦鬼爛忘處所何況鯢身龍首倒側相搪
撐田橫死士無由得熱淚橫流滿東國聊將海舶醉中歌刊
上琅邪臺上石

津門曲

津門楊柳銷魂色鎧火樓臺百千尺潮氣晨連大小沽市聲
夜擁中西宅衣上征塵海氣寒鞭絲斜日接長安橋邊樹暗
魚龍氣陌路花迷蛺蝶殘鯀華十里傾鹽浦車利尼戲波斯
舞黑水旌旗照兩洋白河樓櫺通三輔一自頻年鐵路開津

亭日夕變黃埃牙檣自倚蒲萄客珠島今無翡翠來蜃窗開
處房櫳悄殘鐘十二聞天表夜走雷聲紫竹林朝浮日色桃
花島 聖世車書萬國同昔年營壘照鮫宮飛來遼海樓船
白想見圓明獵火紅樓船獵火今何在京南門戶天之隘上
相勳名自建牙四夷縉帛同租界我今牢落過津門擊筑吹
簫不可聞馱夢馬知霜路滑倚簾人送酒樽溫并刀不剪津
門水蜃市窺來如屋裏但遣胡兒載寶來誰知楚客呼愁起
唱到津門行路難明朝呼騎向燕山他時丁字沽前水應送
離人海上還

憶昔行贈別黃主事膺

憶昔與君隔鄰住晨鷄曙窗鴉墜樹十年與子不見招疾風
吹斷城南霧君爲郎吏漸髡髮余亦狂名躋歧路百年意氣

誰復知萬里關河慘將暮今年江海多風霾蹇驢破帽來燕
臺相逢九衢一握笑蓬沙垢面還驚猜我年十七無所擇幾
度秋風鍛霜鬚子有文章在人口四十雄才羈不得長安城
中多酒壚解裘日日相醉呼五侯七貴不遑顧掉頭卻返揚
雲居沸天鐘鼓自朝夕燕市奇才那曾識卻看天塹限東南
轉眠浮雲變西北人生擊筑無奈何舉杯起舞君當歌太行
千里亘如髮狐奴磧外秋聲多我方迢迢向嶺海越王城闕
今何在夢中蝴蝶向君飛一色羅浮青不改長沙故廬今屢
移倚闌白髮歸何時江鄉蓴菜那能得京雒緇塵徒爾爲明
朝惜別空相笑屠龍我亦還年少客夢招尋珠海邊相思遠
寄青門道

偕徐提學琪東阿渡河提學投壁盟於河神賦贈

濁波九折流湯湯龍門怒走青天旁
犇濤仄出齊魯鄉力與燕趙爭其疆
行河使者今龍堂有夢掀髯來大荒
聞君手捧麟鸞章乘輶卻指天南方
蜺旌羽蓋紛朝鵝夾道驩呼帝
澤霧厯亭回首連清漳金隄大潰嚴
秋防凌晨瑞景開扶桑秉節從容一
輦杭鮫人送喜來洋洋投以懷刺偕
璧璋冰心皎皎不可量仰視白日高
天橫河伯拜受賡載颺曰帝之力家
之慶駢君世胄縣青箱皋夔繼踵開
靈長君今大翻凌九閭歎如五色輝
鸞皇嶺南迢迢躔文昌使星夕吐天
中芒誦芬令蹟遙相望文敬公潮文穆公本父子繼相至君凡六世
明時喜起賡虞唐盟河之志中允臧
波縉忠信君所償瓠子之歌歌武皇
黃沙白葦今康莊我醉爲君奉一觴
祝君行矣樂未央

次韻徐提學見贈

十年放懷山水間九疑突兀湘潺湲今年扁舟走江海一萬
餘里波濤還燕臺相馬疇相士九關不啟嚴更遞從君燕市
浩歌來十日長驅渡黃濟龍門濁浪何渾渾鼉鼉出沒沙隄
根潮頭萬丈向秋落河邊亂碾車輪痕眼底平流如鏡澈蹢
烏一躍青齊白穀城蕤恨弔重瞳河水橫流尙嗚咽脂車曉
渡龍宮前渴虹挂樹秋欲然王程埭驥懷靡及待君猛着珊
瑚鞭安瀾早報騎羊汎輶車已過安平鎮遮莫提壺唱渡河
臣心自濯冰壺淨泰山有夢落枕中蘋鱗掉尾開長風奇思
一夕赴東海仙人召我三神峰神峰迢迢何處所玉樓卻下
葳蕤鎖錢塘家世怒潮來浪花倒灌瓊瑤朵詩思如雲過兗
州嶧陽嘉樹望魚邱不知幾輩猗桐在畱待君家鬢尾收

曉渡

揚子江頭潮正白，篷背好霞收不得。一半青山入酒船，此身又作江南客。寄奴天塹怒濤飛，今古荒蘆雪打圍。商女能歌不能哭，截江空有涇龍歸。

焦山

金山如拳岸旁臥，焦山屹當海門坐。倒插雙螺殿腳懸，孤撐一柱鴻荒破。朝來爲訪焦先宅，鐵甕城邊搖櫓過。蛟鼉瞰客伏山門，猿鳥招人來佛座。周鼎漢陶文可誦，石幢銅鼓奇居貨。椒山遺墨見雙軸，鶴銘殘字餘幾箇。山茗聊從老僧淪，巖花似笑詩人餓。乍轉林腰度山脊，石齧江濤如伏獸。倚檻儼同魚聽梵，扶磴眞看蟻旋磨。大觀臺前莽回首，遠碧層江淨無唾。杖策須妨苔百尋，冒帽還驚竹千个。吸江高閣浩呼淘，數客登臨喜相賀。天容海色盪圓笠，巖樹風帆互顛簸。靈根

削就幾千仞六代江山恨無那攬古頻將大隱招狂譚恐有
江神邏昏鐘向暝卻催人斷壁題詩有龍和月出茫茫不得
歸樓船西上江湖大

金山

我思金山二十年臥遊再泊東吳船焦山歸來日向暮黑風
吹海江吞天蒼巒枕江挂絕壁身欲往訪愁無緣二更鐙火
滿京口渡江頗有風帆懸披衣亟呼卒縛炬卻覓危磴凌層
巔霜痕漸低北固月樹色半墮南徐煙鐘聲上下二百里老
魚出聽空流涎三山隱隱帶樓閣喚我抵足橫江眠浮圖百
丈踏風立十月萬木森霜拳巖腰蟒窟浸深黑但蹴泉響流
涓涓江潯六代戰死魄寺門聽法衣相牽欸搏怪石作人語
意欲攫我蛟龍淵僧堂玉帶欣過眼東坡先生魂渺然憑闌

俯視駭百族惟有浩浩江中穿江神山靈互角力殿腳十載
移江邊此時已爲愚父負何日更受神人鞭吁嗟乎山川變
幻有如此知有麻姑催我歸種東溟田

峽山藤杖歌贈龍淵老人孫瑛

我所思兮乃在羅浮仙頂之中菴揭來騎蝶不得上飛墮峽
山古寺之松杉峽中澗壑無不有澗底蒼藤作龍吼凌晨橫
樗入嶢嶢藤枝笑把詩人手指點七二峰變滅三江口青冥
瀑雨落千尺孱顏不洗霜皮厚藤兮藤兮幾百年虬枝合還
生風煙海潮到此只一宿山靈急挽濤頭旋帝子不得騎壺
公不得攀猿猱不敢爪其骨魍魎不敢升其顛靈根待植向
瓊圃豈徒雄長蠻荒天藤兮藤兮胡爲而窮哉自從昌黎去
不見東坡來倒臥巖谷底偃蹇相胚胎後千百載而有狂客

兮相與摩挲嘯詠於層臺虎豹戰慄蛟鼉決滌洞天平眡南
溟一掌日烈烈兮雲蓬蓬龍爲沃兮豹爲養歟倒景兮晴電
轟縹連蜷兮金碧晃天風吹亂玉女髮倒挂層巒一千丈飛
來寺中僧告予此藤合待詩人鋤我友龍淵子六十身尙儂
目極九州隘躬攬三皇書芙蓉爲裳葛爲屨蓬壺方嶠爲冥
居遠從天目山浩蕩觀南禺顏紅齒未豁頭白髮不梳長歌
一夜出金石聲振林木相呬唔何當攜汝從商瞿或行或起
同將扶水宿刺蛟蜃陸行禦豺獍入林不畏石犖确閉戶亦
伴身醞醑不然化作葛陂龍揮斥八極窮昆都挂瓢挂書並
適用豈必老死荒山陬藤兮藤兮顧予笑早有藤花落吾帽
卽今偕汝謝山靈歸舟聊復相騰趯吁噦龍淵子矍鑠休
言肉生髀受此藤兮杖而起丹巖翠壁不可以徑上但有白

雲濛濛出袖底少年學書劍晚節窮山水不肯低眉過七貴
家不肯折腰爲五斗米葆靈壽兮吾與爾海風吹人人未蘇
山氣壓船船不駛嘍猿在岸鳥在林與藤相別淚如泚藤兮
杖兮如我頑百年日月空等閒狂歌和禽龍淵子他時攜汝
更醉羅浮仙頂梅花萬樹之窮山

鍾乳石歌

并序

連之鍾乳石名在海內使舟入峽載其一品楞軒
窈複草樹皎露內外洞矚音如縣璆提學賦詩屬
于踵和因爲歌詩以贊其質

赭霞迸裂夫容裙神人揚鞭來海門陰巖森森鬼箔闌寶母
夜向龍堂犇大龍渴不眠小龍癡未馴使舟出巖側撞金伐
鼓巖中聞東巖蠅蝠不敢叫西巖猿狖魂逡巡龍王不肯匿

寶母乃遣龍孫持獻君窗中列峨眉座上圖崑崙黝冥一寸
太古裂爬剔眾竅含氤氲神媧補天畏天醜烏兔兩兩中間
蹲白螭盤腸自天下亂齧人閒草樹根左邱右壑陰陽分治
然之神來泗濱使君蓬萊足官府袖底噴出龍灘雲呼玉隱
歌靈氛揖浮邱招女秦大龍昨夜眠小龍今日馴沃之黃金
露盛以白玉盆樓船急敲鱗子雨五嶽倒洗麻姑塵嗟予石
兄湘上邨兩年不見渴欲吞靈胎剖峽豎十髮恍彼天上鵷
鸞羣

龍巖歌

腥風搜巖蛇搏虎老鶴呀呀作人語樹底重潭擂急鼓樹頂
紅棉挂白雨大龍千年死不腐共入龍腸穿兩股佛前翻鐙
踏飢鼠石腹東西東門戶數客蛇行各持炬縋礪白猿導四

五陰森攫人髮倒豎不知其內何官府岌岌懸冰噴墨乳一
竅斜陽破鬼斧微軀穴吞復穴吐轉笑龍頑不予脯怒枯枯
楠叫鸚鵡衣上溼愁生太古歸舟茫茫繫空渚夜看龍王嫁
龍女

陽山謁韓昌黎釣臺

峽雲橫鎖蒼梧牢衝湍激磯磯不逃荔支蘋虬一千樹倒江
都變琉璃濤登臺把袂酌公酒始覺雙鬢風刀刀眼中珊瑚
拂不得白日饒殺東溟龍公從中原獲兩曜手提飛挂蠻荒
高絃歌百里此初謫晚節更墮潮州潮天於嶺人固多福毋
迺有意窮賢豪關干貫柳鯉一尺斜陽欲買紅半篙讀書高
臺杳相峙榕陰捲壑猩猩號明堂笙鏞大匠矩此日叩公心
鬱陶棕屨筇笠兩無語叉魚其待張功曹

韶石歌

勞水天邊混蚪斗玉鎖金繩互樞紐東巖竦立西巖蹲笑殺
搏泥小兒手髯官擁仗出雙闕三十六峰牛馬走五更大海
火雲燒照見童顛兩人偶不知聖媧何事構此毬門鳳閣之
恢奇弃置人閒同瓦缶九成臺前日冥冥蛟龍閣之愁不醒
覬如琉璃拆如綫勢欲倒觸銀河傾悠悠五千年風雨朝百
靈我聞道子工變相安得乞彼圖真形翩然二妃來伫望重
瞳泣蟠桃下翻海波黑鳳簫象管邈難攀笑夢一足當軒立
天風吹淚墮琅玕桃花玉女雙鬟溼九疑蒼梧何處尋松濤
怒打猿聲急石兮石兮爾胡不作零陵墓前雙石人輪鷄環
兔旦夕相追犇而乃兀兀瘴嶺之外瀕江濱陰巖穿漏面目
皴我來停舟顓靈貺但見醜骨懸嶙峋振衣躡峻一長嘯涎

香飄到麻姑裙南中詭異不可以殫述層梯倒湧樓船軍烏
乎作歌兮石不聞空有降霄鸞鶴白日嗥其羣

湖北臬署乃園譙集贈陳主事三立

同座者范仲林
易中實黃修園

天風吹我零丁洋客鬢一年皆老蒼海童被髮引予出西上
大江長復長大江駢人不得語江上截人陳吏部爲熹紅梅
嶺外來不辭黃鶴樓頭主疾風飈江江捲波彌衡痛哭曹瞞
歌江湖行乞一萬里白日所見皆龜鼉眼中迢迢近鄉國裘
敝囊空歸不得一卷新詩擲向君蘭紙濃沾海潮裂君才怒
抉千雌猊舉杯屬我我弗辭闌干共凭日浩浩髡柳自掃江
離離乃園梅花真好客五月來時冬月別范生易子俱天才
黃九雄譚判儒墨提刑名德天下聞

右銘
年丈

羣才赴壑如川奔

招停舍北青驄馬傲殺江東白項羣人生富貴同魚醢况復

妖塵散瀛海破帽行吟海上樓狂花吹變龍堂彩座中諸子
皆能豪劇飲脫君金佩刀殘年意氣各飛動病翼關山空爾
勞羅浮蝴蝶遮予住那得馱君海天去棕笠茸衫不可招有
人挈汝匡廬樹今春君偕中實遊廬山匝月虎也不可使駕車鳳也不可
使守斂我辭君去胡爲乎橫觴四望青天孤茫茫媿客有何
物歸贈湘孺屈大夫

長歌述南北勝遊贈易中實

偃仄復偃仄臨邛大夫人不識栖皇復栖皇邯鄲才人嫁亦
忙橫睇中原三萬里郊島狂名伴羅綺京師滬濱與珠江眼
底花光燭天起靚霞堆作海山春粉氣蒸爲星漢水古而無
死樂何如來日大難行未已相逢易仲子忽墮江之湄貂裘
寶劍各年少揭來老大殊鬢眉爲君歌京師五侯七貴殊未

知車塵迷卻九條陌闕勢低飄五丈旗詩贈唐賢張好好曲
傳宋室李師師櫻桃斜畔人皆瘦芍藥臺邊馬亦肥蝶向太
常檐下覓烏從御史府中飛家家罵戶薶雲子箇箇當筵鬪
雪兒三海日高呼未起五陵秋晚獵毋歸骨求燕市生原賤
肉煮秦宮死亦稀爲君歌滬瀆海外樓臺地中縮樹簇妖燐
不夜城牕攢毒螫諸番屋夾道猋輪鶴共乘分郵電堠龍相
續隊隊天魔下彩霄坊坊脂夜團妖窟黑雲燒斷伍胥愁紅
鬼不爲黃歇哭籠鳥都成比翼禽園花平蕪相思木鏡檻三
千列若眉屏風十二圍成肉積氣應憑毬上升禍水多從壁
中伏歡子歌翻北渚蓮祕辛書削南山竹網得西施定沼吳
到來劉禪休思蜀爲君歌珠江箏船索榭如蜂房蠻夷佗自
誇雄長煙月銀能剏作坊孔翠船篷雙岸柳素馨簾幙四時

妝珠孃夜捧紅雲宴。烏鬼晨窺碧玉廊。鵲首虹橋千百轉。蝸
廬番舶十三行。隄栽石氏珊瑚樹。艇構盧家玳瑁梁。挂出樓
頭鐵鸚鵡。排成殿腳錦鸞戩。犀鉤鈿檻層層幻。繡屨瓊梯曲
曲妨。花埭鎧魂牽碧艦。藥洲槎路犯紅牆。馬援珠是軍中薏。
陸賈金輸嶺外裝。栖皇復。栖皇偈。仄復偈。仄登高賦。豈鍊都
才埋愁詩。述無家別。京師滬瀆與珠江。不賦江山賦花月。九
鼎圖奸古刻金。六州鑄錯今亡鐵。十字門開。蜃有樓。三秋草
長。駝爲陌。并刀翦水。水不流。越弩射潮。潮未沒。萬里歸裝鬢。
欲絲十年磨劍心。仍熱相看易仲子。我歌君勿憂。聞君足跡
臨天下。方言奇字能雕鏤。才名豔妒萬花錦。酒價貸以千金
裘。幾年大梁棄官去。白日醉臥江之頭。聖朝車書四海一。
江山何處容詩囚。京師滬瀆君有述。安得海童送汝珠江花。

月之層樓

東湖阻風同孩齋

趙君仲弢亦號孩齋

大魚噪風江氣赭五更掀破鱗堂瓦龍宮小女饑不眠起向
波心攫人鮓我共孩齋三日客欲斫長鯨無寸鐵天寒水縮
蟄龍移萬木瘖鳴走狂魄吟邊一舸天沈寥地軸欲陷湖神
逃詩人例千颺母怒曾捲屋上三重茅聞道狂飆過東國羣
飛水湧扶桑白八千子弟渡湖來關門有詔新驅賊幾夕神
皋鍛羽哀天吳騰蹶八溟開誰將一掬乾坤淚哭殺樓頭小
范才

題李梅癡畫古松紅梅爲孩齋

梅癡畫松梅作媵紅拂虬髯巧相並孩齋好畫兼好詩直以
梅花爲性命天地中原肝膽存歲寒猶見去來身不知揚子

江頭笛吹瘦梅花賸幾分

代湘君述貽哭靈井呈兩王先生及同志

湘社人文燦如綺湘君醢酒臨湘水哭靈何處挾詩回島外
冤禽抱紅起闌干紅處春人過爲君洗面雙滂沱蓬萊左股
幾日割海水如牆遮不多牆高未醒春人覺牆圯偏聞眾仙
笑天吳衣繡渡湖來鐵撥銅琶趁年少翰林才子汪年頌與胡
眉酒波盪盪吹笙竿旗亭況有葉吏部彬畫壁賭唱傾城姝
南閣高名推祭酒益吾先生畫堂絲竹銷寒九座中白髮泣圓明
獨立滄桑一壬叟王秋先生春風屢放桃枝顛王郎莘田庖厨尤更
鮮黃生瑞憨笑粟生谷青去顧曲周郎鄧生仍不前便娟玉貌花
前立眼底元黃抱花泣飛來七十二條絃戰聲夜和天風急
昨宵內部俞宛平格士舉杯爲話嶠南兵虬髯紅線各無計燭

黯當筵來哭聲玉弩驚天玉樓缺甲舞丁歌幾曾歇不知此

夕倚虹堂繡綽昆侖按何拍一坏乾淨瀟湘樓畫屏清淺垂

簾鉤笑盃本哭哭盃笑與彬以予之笑爲哭哭盃之哭爲笑二寶三嬌空自羞

楚壇憶昔張旗鼓蛻園裙屐連鸚鵡五年家國恨茫茫湖山

痛哭鶯花主袁叔吳其登第恨已遲子由甫潦倒吾無詩帷

中新婦常閉置考功嚴伯不得開尊厄青樓幾曲春風短十二

嬋娟被愁浣欲騎天駟渡銀河傾愁直下黃河滿皮君鹿門行

矣何君才棠羅侯順且上黃金臺擲卻纏頭二百兆君山笑

黛臨江開歸魂替續三魂一萬樹湘桃黯無色酒闌妍唱出

簾櫳恍聽夷歌下臺北前輩風流後輩新百年湘渚論人文

不從東海黃龍飲且醉南朝白練裙

壺天寄廬雨宿連句次王壬叟代功臣會壺天老人

詩韻

務山年文寓湘中作過功臣祠詩王叟
歲代功臣作奮固與叔山和次其韻

士有奇窮逃作吏吾生八九不如意逢君一戾湘江頭銷盡

鶯花少年氣

子

少年故人君最親別來老大驚雙輪我時省

父卻爲客壺天偶寄城東門

由

門東濁醪飲不得君身儼似

飛來石九龍臺殿盡荒青五鳳文章迷皂白

子

相偕有髮哭

盃僧歸來痛哭呼不應但道才名盛王鄧直令勛業追胡曾

由

去國頻年歌五噫大海茫茫無進退笑君兄弟雙好奇纂

錄多於借洋債

子

卽今海國羅天驕中原王氣悲潛消眼前

突兀一枰在胸有萬着空人饒

由

麻姑種桑萬蠶食狂魂莫

踏東南北由來最賈皆罪言標榜文人治平策

子

壺天歸計

無庸商明朝已辦雙歸航有田可耕書可讀不復與世同奔

忙

由

我叩壺翁翻歎息昆才足壯乾坤色乞食甯同張夢晉

著詩恐似錢謙益

子大

元雲上天其象需與子齊年三十餘瀛

裨澄清或有待悲歌太息吾其愚

由父

疏櫺雨挾詩魂醒吟成

儻被壺翁聽勞人兩吏一諸生九州那得同杯茗

子大

聚散休

論前後時旅館荒江同怨咨哭蠶維舟耿不寐歸心暗束湘

船旗

由父

東風笑損洪鱸炭南國山川幾才彥一牕虛白共鷄

鳴萬古元黃數龍戰

子大

歸共哭蠶相討論我當皓首同虞翻

飄零四海念吾子何日把鏡湘上園

由父

贈張治秋祭酒丈

乾嘉以來詩學旨楚壇獨數鄧與王兩君潦倒不得意白眼
橫觴觀八荒祇今朝堂稱作者祭酒詩名照都下夜宴頻催
白項烏朝回更促青驄馬幾日橋門抗疏回踟躕更上郭隗
臺黃圖黯澹薶春色赤縣風雲少異才但道文章能報國誰

知杜老有餘哀麗人三日江頭過照眼梨花撼春破忽漫狂
歌變徵聲桑乾水暖鞭絲墮中興一柱幾能支正始遺音誰
解和看公簪筆搖五嶽幾陪天子臨軒坐朝端人物何茫茫
海水暗打中原牆獨堪拭劍風塵外乍可乘槎星斗傍白日
黃埃高突兀青琴華髮任悲涼元黃變局存詩史潑墨淋漓
泣神鬼一般肝膽向人處白虹怒掣狂瀾紫獮颿吹卷海嶽
塵宇宙睥睨無斯人先生有道在龍螭邀我共酌花前春春
光瘦盡狐奴磧三海橋頭亂春汐欲把詩人骭髒懷洗他天
下焉支色竊藥偷桃世有無長繩不繫海西烏長楊射獵輸
公健夙昔紅顏幾丈夫

題福延壽佛像壽黃知府五十

阿閼門中五獅子大法如聞標月指三十二相歛在咫尺中有

綠髮青瞳子風輪金輪水輪駛一去海天三萬里南極老人
共隨喜見宰官身江漢水寶鐸浮圖矗天起慧燈灼見萬花
隨民謳君俞庶物揆還我使君以素履赤繡衣人蒼水使佛
前奉觴一長跪惟佛之壽不可紀

題李梅癡庶常梧井圖

羅雲不明星斗黑亞細亞洲秋七月天公故遣墮一葉欲爲
黃人警魂魄畫圖慘蕙秋無色坐井者誰翻自得爾我微軀
猶一蝨科頭徙立梧之側梧身匪高井匪冽夜半天風吹髮
裂詩聲吼出支那國蟄井枯龍皆流血東樓尚墨西樓白險
語題詩慰君別江上清涼豈吾宅

楚望閣詩集卷四畢

受業

武進莊
海門周寶臣

校字